





陝西名勝志卷之三

閩中曹學佺能始撰

商州

在府城東南  
三百六十里

領縣四

漢上洛縣通記曰郡在洛上故以爲名竹書晉烈  
公三年楚人伐南鄙至于上洛是也後魏爲洛州  
周顯德始改今名以古爲商於地云志云州城爲  
秦衛鞅所築商於驛在州西五里上洛故城今爲  
鎮距州東九十里○注水經曰楚水源出上洛縣  
西南楚山其水兩源合于四皓廟東又東經高車  
嶺南翼戴衆流北轉入于丹水皇甫謐高士傳南



山曰商山又名地肺山亦稱楚山漢四皓河內軹  
人曰東園公角里先生綺里季夏黃公皆脩道潔  
已非義不動秦政方虐避於商山作歌曰莫莫高  
山深谷逶迤曄曄紫芝可以療饑唐虞時遠吾將  
安歸駟馬高蓋其憂甚大富貴之屈人不如貧賤  
之肆志乃共入商山以待天下之安定按志四皓  
墓在州西四里墓多棟子樹高車嶺在州北二里  
相傳漢高后使張良詣迎四皓之處丹水在城南  
一里呂氏春秋堯有丹水之戰以服南蠻是也史  
記漢高入秦王陵起丹水以應之故水側有王陵  
城○寰宇記云熊耳山在州西五十里其山東西  
各一峯狀如熊耳故名山海經曰熊耳山其上多  
漆其下多櫟浮濠之水出焉西流注于洛古經謂  
此山有仙草得而服之成仙西京雜記云終南山  
多離合草形似江蘼而紅綠是也又有丹青樹其  
葉一青一赤望如錦繡長安謂之丹青樹○秦嶺  
在州西一百里三秦記云秦嶺東起商洛西盡汧  
隴東西八百里嶺根水北流入渭號爲八百秦川  
亦卽丹水所出也水經注曰水出丹魚先夏至十  
日夜伺之魚水郭側赤光上照如火網而取之割



其血以塗足可步行水上故丹水縣以此名丹水  
東南流與清池水合又以為丹水清池本一山也  
○商畧云清池山在州北六十里禹貢正義曰四  
瀆河為大故先言河漢入于江故先言漢商州江  
河之交也秦嶺西水入于河東水入于江熊耳山  
北水入于河南水入于江清池山南水入于江東  
水入于河然其要不外楚水洛水丹水○古老傳  
云州有商君商國商塞商密商顏曰五商按世紀  
堯女女瑩舜次妃也封于商號商君生九子路史  
云商洛有堯女墓今城東九子墓是矣又云女瑩  
生義均及季釐義均封于商曰商君○商國者湯  
以為有天下之稱也書傳契為虞司徒敷明五教  
封于商荀子曰契玄王生昭明居于砥柱遷商邑  
是啓商湯○周禮職方氏分九州為商密之地杜  
預曰丹水縣西南有密鄉楚申息之師所戍也亦  
春秋之三戶矣秦時諺曰楚雖三戶亡秦必楚○  
史記秦孝公十一年城商塞曰峽關曰武關曰白  
羽城曰蒼野聚皆稱險要處按峽關在州西百六  
十里史記沛公攻武關入秦引兵繞峽關踰箕山  
擊秦軍至藍田是也武關詳商南縣下白羽今脩



陽故城是史記楚襄王元年秦出武關有衆五萬  
取析一十五城析卽白羽也在脩水北故曰脩城  
左傳昭十八年楚使王勝遷許于析出師以臨上  
洛哀四年左師軍于鬼和右師軍于蒼野皆此地  
在州南百四十里○商顏漢武帝時臨晉民引洛  
水在商顏下岸善崩乃鑿井深四十餘丈往往爲  
井井下相通行水水頽以絕商顏矣宋邵雍詩十  
舍到商顏雖遙不甚艱東西遡洛水表裏看秦山  
文獻通考有商顏雜錄二十卷臨川樂史撰○商  
畧云州舊城上有迎翠樓取李白雲窓拂青靄石  
壁橫翠色語也州東五里曰石佛灣有洞曰東巖  
泉曰東溪太白有題東溪幽居詩又十里東原上  
有紅崖冶其地產銅舊有錢官又三十五里之洛  
源監亦錢官也又四十里曰棗花原又十里曰老  
君峪北有路通函谷關谷口有老君廟其山形如  
商字曰商山仙鑑云甯真子在夏禹時降于商山  
授以九疇書及洛水真文于是處唐王維詩商山  
包楚鄧積翠靄沈沈驛路飛泉灑關山落照深野  
花開古戍行客響空林板屋春多雨山城晝欲陰  
丹泉通號畧白羽抵荆岑若見西山爽應知綺里



心○州西三里曰權平原漢以來有是名也又一里爲金鷄原其下有鹿跡村又七里曰仙娥峯其麓有西巖洞壑幽邃李太白嘗遊焉有橫天聳翠壁噴壑鳴紅泉之句有仙娥驛去州十五里白居易易詩云谿上郵亭氣早秋樹邊溪色繞床流行人亦羨郵亭吏生向此中今白頭有崇明禪院唐勅建下臨丹水石洞相接宋知州事王禹偁作西巖泠溪會集五縣令登舟賦詩于此○踰丹水曰馬蘭峪峪口有都土地廟相傳唐玄宗寢疾夢商州土地獻桔梗服食遂愈因賜廟祀之像設寃旒爲王者服今尚然又十里曰野人峪林谷深僻秦末避難稱野人者居此晉董景道隱焉衣葉食樹人多效之又十里曰麻澗山礮環抱厥地宜麻故名其山曰熊耳峯卽禹貢導洛至熊耳者也詳見上又五十里爲良餘山亦曰秦望山乳水出焉亦曰楚水出楚山軍嶺爲漢高入秦出師之地○自麻礮行六十里至秦嶺史記曰秦嶺天下之大阻也韓退之南遷經此有雲橫秦嶺家何在之句嶺上有昌黎祠其礮曰息邪礮丹水之所出也丹水南有丹崖山山皆赤壁霞舉若紅雲秀天矣又東南



有南鄉郡割南鄉石礪以爲城者晉宣帝孫暢封  
順陽王因立順陽郡城南門外舊有郡社柏樹大  
三十圍蕭忻爲郡伐之言有大蛇從樹腹墜下數  
圍長三丈群小蛇數十隨入南山聲如風雨伐樹  
之前見夢於忻忻不以厝意及伐之少日果死興  
寧太守王靡之改築今城城北半距水中左右夾  
溪溪深長及春夏水漲望若孤洲焉兩懸之澗歷  
於中北所謂商於者也宋陳與義避金虜寓商經  
順陽城晚步詩六尺枯藜了此生順陽門外看新  
晴樹連翠篠圍春盡水從青天入古城夢裏偶來  
那計日人間多事更聞兵只應十載溪橋路欠我  
盤姍勃窣行○州南二里曰高車山卽漢時高車  
駟馬以迎四皓處也古有四皓廟又南曰文屏山  
相連曰龜山其山三級首西尾東隆負若龜俯南  
秦川又南有楚水出焉與丹水乳水合流逕鷄籠  
山又三十里曰劉嶺嶺甚危峻萬木森羅唐高太  
素結廬于此有報時猿值子午二時猿卽鳴啼其  
餘爲凝碧池清心亭諸勝温庭筠贈以詩曰茅堂  
對薇蕨爐煖一裘輕醉後楚山夢覺來春鳥聲采  
茶溪樹綠煮茗石泉清不問人間事忘機過此生



○州北三里曰戴雲峯其山欲雨先雲峯律高出望之若旗俗謂之搨刀山蓋州主山也亦名智亭山相傳四皓所隱世人推其有避世之智矣其下爲大雲寺寺東曰少谷泉西曰西平泉合之爲普濟渠通入城市便於飲汲又二十里曰黃砂嶺嶺上有馬跑泉合于普濟又三十里曰安山山下有安山驛川曰泉村曰大荆曰紫榆澗卽清池水所出○輿地碑目云倉頡古跡今存二十八字舊有廟在城南秦少游記○商州刺史歐陽睦碑顏真卿撰并書○後唐中書省照會勅賜太傅工部尚書任圜謚忠愍祭葬其裔孫慶雲曰吾家千年舊物也慶雲嘉靖間歷官轉運使撰商畧

商南縣

在州北八十里

古商國卽商所封者盛弘之荊州記云武關西北百二十里有商城是也舊屬商縣地 國朝成化陞縣爲州始析其扶川北佛等里置縣名商南○志云商洛山在縣南一里商洛川在縣東南八里班固西京賦曰商洛緣其隈漢書高祖發巴蜀之民定三秦遷其渠率處于商洛之地當此處矣○武關在縣東南九十里左傳哀四年楚使謂晉大



陝西各州府志卷之三  
夫士蔑曰晉楚有盟好惡同之若將不廢寡君之願也不然將通於少習以聽命杜注云少習商縣武關也將大開關道以伐晉也考括地志武關山爲地門史記秦昭王與楚懷王書云願與君會武關面約結盟昭王詐令一將軍出兵武關號爲秦王至則閉執懷王以歸卽此晉杜篤論曰杜口絕津朔方無從一夫舉壘千夫沈滯者也唐岑參題關門詩來亦一布衣去亦一布衣羞見關城吏還從舊路歸李涉前題遠別秦城萬里遊亂山高下入商州關門不鎖寒溪水一夜潺湲送客愁○志

云縣治唐層峯驛址也杜牧有宿層峯驛寄李諫議詩又韓昌黎集公自序云去年自刑部侍郎貶潮州乘驛赴任家亦譴逐小女道死殯之層峯驛旁蒙恩還朝過其墓因留題驛梁有數椽藤束木皮棺草葬荒山白骨寒之句○縣東二十五里巡檢司唐之富水驛也有古漢王城世傳沛公所築○兩河在縣南西入雷家灣東出金丰溝斜流一百餘里自雷家灣以下名上兩河自徐家店以下名下兩河○扶川有上中下凡三各去縣南一二百里與兩河水俱入商河○分水嶺在縣西十里



其水分東西流故名○雙廟嶺在縣南二十五里  
卽唐張許廟也又十五里爲吐霧山峯嶺最高天  
將雨則濛濛霧起又十里爲大小嶺關南望荆楚  
數百里如在目中矣

洛南縣

在州東  
七百里

漢上洛縣地晉之拒陽縣也隋開皇間改今名理  
在清池川○郡國志云南齊有上洛郡領陽渠攷  
陽渠卽洛南也清池川出州界安山下之紫榆礪  
曰大小黃川春秋盜跖之藪匿矣又八十里爲玄  
扈水河圖玉版云倉頡爲帝南巡狩登陽虛之山

臨於扈洛汭之水靈龜負書丹甲青文以授之按  
玄扈山距縣西北一百里黃帝錄云帝在玄扈山  
與大司馬容光左右輔周昌等百二十人有鳳銜  
圖以至帝前圖以黃玉爲匣署曰黃帝詔司命某  
集帝行錄帝令開之其文可曉乃再拜受圖焉○  
志云大谷龍龕山在縣東八十里其山北接秦嶺  
多出麩金又北爲魚難山魚難水出焉崖高五十  
餘丈謂之撲水崖魚不能過故曰魚難又南流經  
石門入洛兩石相夾中通行路崖高萬仞極爲險  
阻俗謂之鬼門也玄扈水乃洛川上流今名黑潭



陝西各州志卷之三十一  
子水經曰謹舉山玄扈山陽虛山獲輿山龍餘山  
蟲尾山鹿蹄山冢嶺山竹山皆一山而異名耳又  
歷清池山旁東合武里水水出武里山東北注于  
洛洛水又東門水出焉爾雅所謂洛別爲波也洛  
水北有發戶山發戶水又東三要水入焉南出三  
要山西北逕拒陽城南東流入于洛洛水又東與  
獲輿川水合水南出獲輿山俗謂之備水也東北  
逕獲輿川世名爲却川北有墨山繪綵奮發黝然  
若墨俗謂之墨洞水以注于洛東北至盧氏入河  
南界○按志洛水泉在縣西一百里秦嶺下南流  
入洛縣以此名○王喬山在縣東南一百里相傳  
仙人王子喬隱此又縣北二十里書堂山以張良  
辭漢讀書其中而縣東郊外之藏修洞則宋陳希  
夷先生來藏修于此後乃之華山

山陽縣

在州東南  
百一十里

國朝成化丙申歲商山盜王彪之亂旣平撫治尚  
書原公傑分商州地與商南同置按古有陽亭聚  
在故陽亭縣平陽水出焉斯縣以之名也其山曰  
安武山其水曰關柎色河匯甲水入于漢圖經亦  
以甲水漢江在縣境○志云甲水又西南一里曰



花水河其水清冽見底其澁有雲蓋寺唐賈島隱處注水經云表德溝兩河入洵水即晉洵一水之分界也又東合甲水口水出秦嶺山東南流逕金井城南又東逕上庸郡北與關柵水合出上洛陽亭縣北青泥山南逕陽亭聚西俗謂之平陽水南合豐鄉川水出弘農鄉東山西南流逕豐鄉故城又西南合關柵水又南入上津注甲水以達漢江  
□按甲河在縣南百二十里以方向而名俗曰夾河者非是又三十里為兩河發源商州至竹林關與銀花河合故有兩河之稱○志云孤山在縣東

六十里四周平坦中直一山○天柱山在縣南八十里壁立萬仞形如天柱其上平坦有清池可資汲飲唐羅公遠宋邵雍皆隱焉康節先生從商守給戶帖詩曰一簇煙嵐鎖亂雲孤高天柱好棲真從今但作西歸計免向人間更問津○任嶺在縣東南百二十里與上津接壤而縣東二百餘里之光照山錯入湖廣鄖西界內○雍大記云縣之圓覺寺有古碑云大德元年丁酉歲華藏僧掘地獲之已斷裂惟留大唐貞觀二年六字其後增書大元國奉元路商州豐陽縣等字豐陽置邑唐已前



陝西各縣志 卷之三  
無考至元成宗時始見 國初廢豐陽爲巡簡司  
後移巡司于漫川復立此縣焉在按豐陽乃後周  
時縣名自漢至晉皆曰農陽十六國春秋秦苻健  
都長安以荊州刺史鎮農陽是也農陽以縣有弘  
農鄉而名後訛爲豐

鎮安縣

在州南  
五十里

本漢洵陽縣地唐之安業縣也故今縣曰鎮安矣  
唐之乾元五代之乾佑皆以年號名縣至元廢爲  
乾佑巡簡司 國朝景泰二年仍置縣改今名○  
長安志云泮水在縣東五里出秦嶺下流入金州

洵陽縣界車輪山在縣南二十五里其水流出爲  
鎮安河遶縣治南○乾佑河在舊乾佑縣東二里  
距今治八十里又縣東八十里曰秋林川通乾佑  
洞宋知永興軍寇準得天書于乾佑山卽此○按  
郡國志唐萬歲通天元年析豐陽置安業故乾佑  
渠卽豐水也宋高宗以地界西割商秦之半止存  
上津豐陽以劉嶺爲界南屬宋北屬金 國朝割  
上津入鄖豐陽曼川二界俱有之知州劉承學詩  
我上鄖陽三往過蠻上六南北朝發時期定豐陽  
宿豐陽蓋屬要津圖經以爲地當秦楚之交者也



○志云蠻王紫若即曼川古戎蠻子之國左傳哀四年单浮餘圖蠻氏蠻潰子赤奔晋陰地公羊曰赤者何戎蠻子之名○兩河洵水在縣南關柎水在縣北兩河關柎見山陽下右洵水去縣一百里唐府兵之制商州有二曰洵水王京是也○長安志云蘊水在舊縣西南七里出考山下流入汴河故乾祐鄉轄下有蘊谷里○長陵山在縣北二十里以崖岫綿延而名又十里為石馬山上有石如馬狀○夢谷山在縣東北三十里其山危峻常有雲起八景之夢谷晴雲以此又五十里為重崖山崖谷重疊望之無窮○聖燈崖在縣南百五十里雲蓋寺側清夜有聖燈自崖畔出○縣西南二十五里有聖燈龕其下為白龍洞洞深里許清泉出焉流入于洵○縣西四十里有瀑布泉唐太宗詩東望香爐山西觀瀑布水飛流三千丈崩岍數十里

華州 在府城東 二百里 領縣二

周畿內國宣王二十二年封庶弟友于鄭是為桓公地名咸林故國語曰鄭桓公為周司徒采地咸林也春秋秦晉分境僖十五年晉侯許奉秦伯以河外列城五南及華山是矣後魏太平真君二年



于此置華山郡西魏廢帝始曰華州遯秦則爲內  
史兩漢及晉之京兆弘農二郡地也州理鄭縣城  
北二里有長城故址史記魏築長城自鄭濱洛卽  
此寰宇記云古城連接今州城官路經其中縣設  
周智光生祠邊是矣口唐書列傳智光與魚朝恩  
善永康中爲華州節度使恃功脅王自設生祠令  
民禱賽詔郭子儀討之智光尋爲其帳下所殺子  
儀鄭縣人○注水經云鄭縣城南山有五部神廟  
東南向華岳其廟前有碑後漢光和四年縣令裴  
畢君先所立今按碑文有石隄樹谷御史大夫將  
軍牧伯其廟中題署有五部者謂石西戍樹谷明  
神五婁先生東臺御史王翦也○名山記云少華  
山在華州東南十五里山海經曰太華之西八十  
里有少華山其木多荆杞其獸多牝牛其陰多磬  
石其陽多璆瑋鳥多赤鷲爾雅云西南之美者有  
華山之金石矣○注水經云渭水又東石橋水注  
之水南出馬嶺山積石據其東麗山距其西源泉  
上通懸流數十丈與華岳同體其水逕鄭城西經  
又云沈水北逕沈城西酈道元以石橋水故沈水  
也按州東南十五里驛路南石橋東有沈陽城漢



陝西各縣志卷之三  
縣屬左馮翊後漢省○郡國志云細腰原在城西  
南十六里原勢中狹因名又南有孤栢原愚水出  
焉合于灌水北流注渭灌水一名小赤水山海經  
云灌水出石脆山今名高谷水又有大赤水一名  
箭谷水卽竹水也竹水出竹山經媚加谷歷廣鄉  
原北流注于渭按竹山在州西南百四十里高千  
二百六十丈山海經云竹山其上多喬木其陰多  
鐵相連有英山其上多杻榘又有符愚山其陽多  
銅其陰多鐵符愚之水出焉北注于渭渭水又東  
逕巒都城北故潘邑殷契之所居也世本曰契居  
蕃闕駟曰蕃在鄭西然則今巒城是矣俗名之爲  
赤城苻健入秦據此城以亢杜洪小赤水卽山海  
經之灌水也水出石脆之山北逕蕭加谷於孤栢  
原西東北流與愚水合水出英山北流與招水相  
得亂流西北注于灌灌水又逕觀愚之山北流入  
于渭渭水又東逕鄭縣故城北史記秦武公十年  
置栢公友故邑也春秋國語曰鄭栢公爲周司徒  
以王室將亂謀於史伯而寄孥與賄於虢郟之間  
幽王卒於戲栢公死之平王東遷鄭武公輔王室  
滅虢郟而兼其土故曰周之東遷晉鄭是依後漢



赤眉樊崇於鄭設壇祀咸陽景王而尊右校卒史  
劉俠卿牧牛兒盆子爲帝年號建世後月餘乘白  
蓋小車與崇及尚書一人相隨向鄭北渡渭水卽  
此處通志云古鄭縣城在州東北二十里爲鄭公  
始封者後周徙在西南九里元始省鄭縣入州○  
明張光孝華州志云州城內有隆阜唐棲雲樓故  
址昭宗東遷時行宮也棲雲一名齊雲元楊維禎  
齊雲樓序畧云乾元三年李茂貞舉兵犯關韓建  
請上幸華州茂貞入長安燔宮闕殆盡昭宗登齊  
雲樓望京作菩薩蠻二章其末云野煙生碧樹陌

上行人去安得有英雄迎歸大內宮酒酣與從人  
悲歌泣下或云古昭慶院有棲雲樓假以駐唐宗  
蹕其後遂因之爲州治云○城東關外有太平橋  
在古唐城內今大雲橋是其遺蹟西關外曰小石  
橋受石隄峪及諸泉水按石隄樹谷卽五部神廟  
碑所載者小石橋以東北有石橋水故此稱小○  
少華峰東連華山以視華山差低小耳右爲獨秀  
峰或曰玉女峰其下爲敷峪敷水所出唐開元中  
姜師度鑿之使通渭漕宋元祐間小敷峪崩天禧  
五年近峪口阜頭峰崩其崩處名半截又曰復成



山又東爲方山接華陰境○少華峰之西曰白石峪潭峪水峪水峪之麓有甘露寺唐鄭谷詩石門蘿逕與天隣雨檜風篁遐邇聞飲澗鹿喧雙派水上樓僧踏一梯雲孤煙薄暮關城沒遠色初晴渭曲分長欲燃燈來此宿北林猿鶴舊同羣○白石峪之西爲鄭南峰以後周所移鄭縣而名又西卽石隄峪峪水流至良侯村北曰五港河合赤隄峪入沙澗石橋河以達于渭近西一帶諸水曰西溪時人目之爲小曲江以杜子美爲州司功時所曾遊也少陵題鄭縣遊春亭子詩鄭縣亭子澗之濱

戶牖憑高發興新雲斷嶽蓮臨大路天晴官柳暗長春巢邊野雀羣欺馬花底山蜂遠趁人更欲題詩滿青竹晚來幽獨恐傷神○自遊春亭西南三里爲鄭縣故址鄭縣東十三里曰武城史記魏文侯三十八年伐秦敗我武下卽此一名光武城相傳光武帝征隗囂時所築○又西卽唐郭令公故里遺裔尚多其故宅有井一口人稱曰汾陽王井聚而汲飲之○金石錄云漢東方朔墓在州西南三十里題曰漢大中大夫東方生之墓○唐華州新廳堂記吳丹撰并書元和八年二月立○唐華



陝西各州志卷之三  
州後閣記李正撰辭正書元和八年三月立○詩  
話云杜少陵集有鄭南伏毒守瀟灑到天心殊不  
曉伏毒守之義按守當作寺在伏毒巖上劉中山  
集有貞元中侍郎舅氏牧華州時予再忝科第前  
後由華觀謁陪登伏毒巖是也華州圖經亦載之

華陰縣

在州東  
七十里

禹貢導河積石南至于華陰春秋之陰晉也今縣  
東南五里有陰晉古城是左傳宣二年晉趙盾救  
焦遂自陰地侵鄭杜注陰地晉河南山北自上洛  
以東至陸渾也三家分晉是爲魏境魏納于秦是

曰寧秦漢書高帝八年更寧秦爲華陰縣以在太  
華之北故名○山海經云太華之山削成而四方  
其高五千仞廣十里鳥獸莫居有蛇焉名肥蠃六  
足四翼見則天下大旱此山遠而望之有若華狀  
故名華山注水經云華岳有二峯直上數千仞基  
廣而峰峻疊秀屹於嶺表有如削成今博山香爐  
形實象之又華山與首陽本一山河神巨靈擘開  
以足踏離其下分爲兩山以通河流故掌與腳跡  
存焉曹植述征賦表神掌於巖首張衡西京賦綴  
以二華巨靈巖高掌遠躡以流河曲也山頂有



池生千葉蓮服之羽化因名華山白虎通云西方  
華山少陽用事萬物生華也爾雅云帛似帛布似  
布華山有之郭璞註草葉似布帛王處一亦云草  
布曰西岳布者是也韓子曰秦昭王令工施鈎梯  
上華山以節柏之心爲博箭長有八尺而勒之曰  
昭王常與天神博云太元真人茅盈內記謂始皇  
三十年九月庚子盈曾祖父蒙於華山乘雲駕龍  
白日昇天先是邑人謠曰神仙得者茅初成駕龍  
上昇入太清時下玄洲戲赤城繼業而往在我盈  
帝若學之臘嘉平漢武內傳魯生女長樂人初餌  
胡麻乃永絕穀八十餘年少壯色如桃花一日與  
知故人別入華山後五十年先識者逢生女于廟  
前乘白鹿從王母云神仙傳中山衛叔卿常乘雲  
車駕白鹿見漢武帝將臣之叔卿不言而去武帝  
悔求得其子度世令還追其父度世登華岳見父  
與數人博於石上勅度世令還山峯雲秀故能懷  
靈抱異耳上有二泉東西分流狀若山雨滂湃洪  
津泛灑挂溜騰虛直瀉山下詩神含霧云華山上  
有明星玉女手持玉漿服之成仙矣□按華岳志  
岳頂中峯曰蓮花峯太上崖明星玉女祠玉女洗



頭盆石馬玉龜躡鎮岳宮玉井蓮□東峯曰仙人  
掌石日月□西峯曰巨靈足□南峯曰落鴈峯黑  
龍潭五粒松仰天坪李白登落鴈峯嘆曰此山呼  
吸之氣可通帝座恨不携謝朓驚人詩來問青天  
□岳北腹中曰瀑布石仙人洞水簾洞□岳頂東  
南曰老君洞太上泉丹爐菖蒲池焦公巖基石白  
鹿龕三公石室基□西北曰毛女峯壺公石室太  
極總仙洞洞玄石室肥蠶穴算塲蘆花池□東北  
曰雲臺峯試鑿穴長春石室公主峯漢末王莽之  
將篡也南陽公主避亂奔入華山中後以仙去公  
主旣于山中得道駙馬王咸追之不及留雙屐以  
示之晉潘安仁有公主峯記□山麓有集靈宮存  
神殿存仙殿集仙宮望仙觀皆漢晉時宮觀名也  
漢書云華陰縣有集靈宮三輔黃圖云望仙觀在  
華陰縣晉武帝造故張昶華岳碑云漢武慕其靈  
築宮在其後矣□圖經云雲臺觀在縣南六里以  
華山嶮峻難登先置下方于山麓唐天寶元年勅  
于熊宇嶺置中方號曰太清宮□瓊岳宮在縣西  
十八里隋大業四年本名敷水宮唐顯慶中改今  
名按縣有敷西城以在敷水之西而名郭延生述



征記爲苻姚所置酈道元云渭水又東敷水注之是矣去敷水谷七里有車箱谷方而長似于車箱祈雨者以石投之有一鳥飛出應時獲澍杜甫望嶽詩云車箱入谷無歸路箭筈通天有一門○廟記云縣南山下有南北二廟北廟有古碑九所其一 是漢鎮遠將軍段熲更修之碑黃門侍郎張昶書魏文帝與司徒校尉鍾繇弘農太守毋丘儉各於碑陰刻二十字列其姓名廣六行鬱然循平其一 是太康八年弘農太守衛叔始爲華陰令裴仲恂役民逸力脩慈壇廟夾道樹柏迄于山陰事見

永興元年華百石所造碑南廟是華北君祠今有北君靈臺上仙下仙四神童院其廟外柏樹二千餘株後周文帝所植□郭緣生述征記云山下自華岳廟列柏南行十一里又東迴三里至中祠又西南出五里至南祠南入谷七里又至一祠又南一里至天井井內望空視明如在室窺窓出井東南一里至峻坂斗上又東至東柯坪僕馬皆屏去無用上百丈崖皆須板繩挽葛而後行按青柯坪在山谷盡處初登太華之所西北有瀑布泉水來注之又 有種藥坂昔王渾真人居焉嘗駕虎豹種



蒼朮黃精爲餌詠九字詩百餘言人莫解其意又有陳希夷菴希夷名搏字圖南唐長興中舉進士不第因肆意山水後之華山靈臺觀居焉宋太宗賜號希夷先生□岳之東曰王刁洞仙人王遙與友人刁自然昇仙處□藏馬谷相傳漢武求仙時有神馬出藏此谷中故名□文仙谷賈君所居有詩碣今呼爲羽谷菴□又東曰碧雲洞碧雲溪黃神谷牛心谷□迤西卽車箱谷谷內有脩羊公石榻坐穿之跡猶存又有霧谷後漢張超能布五里霧者谷口有泉色如瓊漿俗稱霧泉又西有石羊城乃黃初平叱石化羊之處今但名仙谷□西南曰桃谷甕谷竹谷羅敷山大敷谷又西南曰華陽藪○山海經云華山首曰錢來山其上多銅有鳥名鳴渠狀如山鷄黑身赤足與松果山相連接松果山在縣東南二十七里又十二里有潼谷水南經松果山北流入于黃河神靈經云馮夷者弘農華陰潼鄉人也食水八口得仙于此唐天授初置潼津縣長安二年廢今爲驛有石橋尚名潼津橋卽潼關水所逕也潼水在關西一里關因以名而其阨塞處則曰桃林塞左氏文十三年晉侯使詹



嘉守桃林之塞註疏桃林在弘農華陰縣東潼關是矣自函谷至斯高出雲表幽谷秘邃深林茂木白日成昏又名雲潼關本名衝關河水自龍門衝激至華山東也按今關乃隋大業七年移于鎮城門坑檻谷置去舊關已四里餘至唐天授二年移近向北臨河爲路玄宗開元十三年於華岳祠南通衢立碑御製其文并書卽此是新關南路也舊路在岳北自後牧是州者多帶防禦潼關軍使國朝以備兵使者治之潼關衛屬中軍都督府西距華陰縣四十里唐杜甫有題潼關吏詩卽此○帝王世紀云女媧陵在潼關衛城東三里黃河北崖唐天寶初風雨晦冥忽失所在至乾元仍復按卽風陵堆也○三輔故事云漢太尉楊震改葬華陰之潼亭先葬十餘日有鳥高丈餘集喪前悲鳴葬畢始飛去時人刻石像鳥立于墓前與符秦丞相王猛墓相近二冢並在今潼關西渭河岸北楊震碑見存周文帝破東魏軍殺大將竇泰於此貞觀十一年太宗因幸墓所傷其忠赤非命親爲文以祭之○汪水經云渭水東逕平舒城史記秦始皇三十六年秋使者從關東夜過華陰平舒道有



人持壁遮使者曰為我遺鎬池君祖龍君死是歲  
始皇崩于沙丘渭水又東逕定城述征記云段熲  
所造去潼關三十里夾道各一城城下有泥泉水  
出焉水出南山靈谷而東北流注于渭水也按志  
平舒城在縣西南定城縣置于後魏永熙三年尋  
廢今定城驛是○渭水又東沙渠水注之水出南  
山北流西北入長安城城自華山北逕于河歐陽  
修華岳銘曰秦晉爭其祠立城建其左者也○西  
爭珥云華陰有鳳居山唐開元間鳳逐二龍至此  
龍墮地化清泉二道鳳憤而死僧以石函其骨瘞  
之山巔累石為塔覆之我景泰間鄉民取甗石築  
城函遂露啓函鳳脛骨長二尺股骨長一尺五寸  
色如玉云

蒲城縣

在州城北  
百二十里

西魏廢帝二年改南白水縣為蒲城縣以東有故  
蒲城而名唐開元四年改為奉先縣以奉睿宗橋  
陵而名宋開寶二年復為蒲城○寰宇記云故奉  
先城距今縣治三十里即古蒲城也有晉城又有  
重泉城俱在縣東南五十里晉城相傳晉公子重  
耳所築史記秦簡公城重泉王莽改曰調泉後漢



書王阜字代公為重泉令鸞鳥集縣屋旬日聞奏  
 雅樂應聲而舞○二三秦記云長城在縣東五十里  
 洛水所經闕駟以為洛水即沮水也名曰灇洛亦  
 即秦孝公築長城自鄭濱洛處矣偏南有木屐槌  
 四在沮水岸舊說禹治水至此屐下棄泥積之成  
 槌各周二里崇一百尺又水側有沙城英雄記云  
 曹操與馬超隔渭水陣渡渭輒為超騎所衝突婁  
 子伯說操以今時天寒可起沙為城以水灌之一  
 夕而成即此處也○縣西南十八里有賈城古之  
 賈國左傳桓九年芮伯梁伯賈伯伐曲沃者是又  
 二十二里為魯王宮城大統記曰即魯哀公城也  
 視其餘迹尚有宮城板築之象今屬內政村○長  
 安志云堯山在縣北二十里舊經堯時洪水為災  
 此山獨浮亦名浮山又有一山在堯山前曰重山  
 以其附堯山有重疊狀○金粟山在縣東北三十  
 里天雨山出碎石若金粟然又五里為白堂山圖  
 經云白起立寨於此南有不羣山以諸峯相接惟  
 此獨峙故又名孤山○豐山在縣西北二十里一  
 名蘓愚山其南有仙臺觀唐金仙玉真二公主入  
 道所置○蟠龍山在縣西二十里唐明皇遊此俄



雲霧務中有若黃龍狀觀而異之於下得石宛似蟠  
 龍因以其地為龍樂鄉又十里即西鹵池也長安  
 志曰白鹵鹽池東入沮水濶五十尺深二丈蓋鹵  
 水汎漲流注故曰鹵渠又有東鹵池在縣南二十  
 里漢書宣帝微時困于蓮勺鹵中即此唐至德後  
 鹽不復生○志云唐睿宗橋陵在縣西北二十里  
 豐山龍樂鄉所管○玄宗泰陵在縣東北二十里  
 金粟山高力士陪葬○憲宗景陵與泰陵同里屬  
 金幟山○穆宗光陵在縣北之堯山山已見前○  
 長安志云縣有唐折衝府曰相原曰孝德曰温湯  
 曰宣化曰懷仁凡五按相原今之賢相鄉舊管勳  
 貴里者又有崇德善德懷仁各鄉即孝德宣化懷  
 仁諸府所由名也温湯在縣東六十里源出沮水  
 岸西流二里入于沮水其沮水西岸舊有晉太子  
 虛糧寨○塚廟記云唐張建墓在縣西二里有碑  
 剝落又十一里為李思訓墓李邕書碑即雲麾將  
 軍碑也○金石錄載有唐薛苹碑唐史列傳云苹  
 父順為奉先尉而此碑及元和姓纂皆云各順先  
 蓋史誤爾○杜甫題奉先劉少府畫山水障歌有  
 及思前宵風雨急乃是蒲城鬼神入之句



同州 在府城東北 領縣五

禹貢漆沮既從澧水攸同言一水至斯同流入渭也故西魏以之名州矣集古錄云同州有白樓唐暨眺詠之所合徠楚作賦刻其上○雍大記云同州蓋昔河西地左傳秦穆公送晉公子夷吾夷吾謂曰誠得立請割晉之河西八城與秦夷吾立背約不與戰于韓原虜晉君以歸夷吾始獻河西地東至河史記韓信傳涉西河正義云卽同州龍門河從夏陽渡者地里志關內有關三十餘同之龍門其一也○一統志云漆河源出扶風古漆縣西

沮河自延安宜君縣西北俱至舊富平縣界合流入同州朝邑縣東南注于渭按沮水卽洛水也以沮入洛故水經云洛水東逕沙阜北其阜東西八十里南北三十里俗名之曰沙苑西魏大統三年宇文泰與高歡戰大破之其時泰兵少隱伏沙草中以奇取勝後於兵立之處建忠武寺令騎士種柳各一株數及七千至今沙苑多柳樹仍以其地宜六畜置沙苑監豢養隴右牛羊諸畜以供尚方之用故杜甫沙苑行有云君不見左輔白沙如白水繚以周墻百餘里苑中駉牝三千疋豐草青青



寒不死。○集異記唐明皇十三載重九獵於沙苑，雲際有孤鶴徊翔，上親御弧矢，一發而中，其鶴帶箭墜而復起。及幸蜀，遊道觀中，視所掛箭，道士徐佐卿題乃上獵沙苑之日也。○注水經云：洛水南經商原，西俗謂之澣原，原下有泉水，味鹹苦，羊飲之肥而肉美，諺曰：苦泉羊洛水漿。卽此。按沙苑在州城南十三里，商原在城北三十五里。○志云：州東南八里有九龍泉，出沙阜中，以九穴同注而名。唐韻會注：馮翊南有九泉，同于一流，故名其州也。又有龍泉洞，在州西北二十五里。西漢村，唐太和六年，僧慧義開闢，有龜蛇峯、清涼洞諸勝。○重泉在州西北二十里，卽漢武帝爲李夫人築城處，遺址尚存。漢書武帝時，嚴熊言：臨晉民願穿洛以溉重泉田，萬餘頃，故惡地誠得水，可令畝十石者也。○紅善泉在州西南四十里，又十里爲蘓村，泉俱自平地湧出，流入渭，渭河在沙苑南，今謂之馬坊頭。○郡國志云：州所理城，後魏永平三年，刺史安定王元燮築其東城，正光五年，刺史穆弼築西，與大城通，其外城。大統元年，刺史王羆築其地，卽漢之臨晉縣。在景帝爲左內史，武帝爲左馮翊者也。



按馮翊縣本州理所元始省入故址在文廟東有古碑畧云馮翊故城如龜形至唐始易為方城曳首于前尾于後云○志云鍤鎌山在州北二十五里沮水之岸土具黃白赤三色其形如鎌故名○州西有黃堆山唐書廣德元年三月甲子党項羌寇同州郭子儀敗之于黃堆山是也○白馬池蓮花池俱在州西南三十里又十里曰清池○南溪池亭在九龍泉側唐咸通中太守王龜齡建後梁貞明節度使程暉復增飾之御史中丞蔡曙記其事有碑刻存○大興國寺隋開皇建文帝以西魏大統七年誕生馮翊及得天下剏為寺塔崇報母恩寺內有臺柱上塑蟠龍四周佛像極其雄麗唐開元間太守王琚縣令靳翰重修○塚廟記云唐王仁皎墓在州西三十里玄宗后父封祁國墓碑御書張說撰神道碑字畫剝落見在墳高一丈九尺其子駙馬都尉守一所請也○顏真卿祠在州治內魯公曾為此州守故祠之後貞元中鄭建克以金吾上將軍為節度使出鎮是州有惠政民亦為立祠○金石錄云後周同州刺史普六如忠墓誌天和三月七日立○唐同州刺史解琬碑蘓頔



撰梁昇卿八分書開元二十三年五月立○唐同州河瀆紀瑞頌崔禹錫撰王敬宗八分書先天元年八月立○唐同州刺史崔淙遺愛碑楊憑撰韋縱書貞元十七年十月立○唐三藏聖教序太宗撰褚遂良書龍朔三年同州重立○唐崔淙謝廣利方表德宗貞元中自著方書號貞元廣利方頒行郡國淙時為同州上表稱謝詔刻諸石

朝邑縣

在州東三十里

注水經云洛水東南歷強梁原俗謂之朝坂也按西魏以朝邑名縣本此其地在周為大荔戎國有故王城在縣東三十步左傳僖十五年晉陰飴生會秦伯于王城註疏王城秦地馮翊臨晉縣東有王城是也史記魏文侯十六年伐秦所築武王元年與魏惠王會於臨晉即此城縣道記曰臨晉城在縣西南二里故芮鄉因秦築壘以臨晉地乃曰臨晉○郡國志云長春宮在強梁原上周保定時宇文護築初名晉城建德二年置長春宮隋開皇中增構殿宇大業末唐高祖義旗起大軍濟河舍于此宮休甲養士西定京邑自後凡牧是州多帶長春宮使○水經云洛水經懷德城按在縣西南二



十一里漢縣也漢書註云洛水東南入渭今故城在渭水之北沙苑之南一名高陽城○洛水又經蒲津關因蒲坂又以河津也戰國時魏置關於此苻秦皇始四年十月霖雨河渭俱溢蒲津監寇登得一履於河中長七尺三寸人指長尺餘深一寸苻健見而歎曰覆載之內何所不有按河津處有浮橋左傳昭公元年秦郈子出奔晉造舟于河杜預注云造舟爲梁通秦晉道也岸左有河瀆祠郊祀志云祀河于臨晉是矣西魏大統于漢祠更加營造宇文天和中建碑一所大象元年勅江淮濟各從本所祀惟此一祠依舊無改唐天寶間封爲靈源公寰宇記以開元初州刺史姜師度引洛水及堰黃河作陂灌田二千餘頃名曰通靈陂○志云臨晉渡在縣北六十里昔魏豹盛兵于蒲坂以塞臨晉者也縣東二十五里有臨晉關一名潼津關臨黃河岸唐玄宗早度潼津關詩鐘鼓嚴更曙山河野望通鳴鑿下蒲坂飛旆入秦宮地險關逾壯天平鎮尚雄春來津樹合月落戍樓空馬色分朝景鷄聲逐曉風所希常道泰非復候繻同按今名大慶關接蒲州界有鍊牛在關東岸四西岸三



唐開元時鑄○儲光義與朝邑王簿期不會作詩云下位日趨走久之賓會疎空遲偶詞賦所媿比園廬朝念池上酌暮逢林下書方將固封守暫欲混畋漁衰柳隱長路秋雲蒲大虛遙遙望左右日入未迴車

郃陽縣

在州城東北  
百二十里

郃水自西北經縣界東入黃河縣以此名詩大明篇云在郃之陽漢高帝時匈奴攻代劉仲棄國而走廢爲郃陽侯是也按郃本作洽唐置洽州于此其後流絕去水加邑因降州爲縣改名郃陽○縣道記云郃陽城魏文侯築古莘國地伊尹耕于有莘之野周散宜生爲文王求有莘氏美女以獻紂應劭云莘國在洽水之陽矣武王母太姒卽此國女詩曰纘女維莘長子維行謂此也系本莘姒姓夏禹之後史記秦惠文君十一年更名少梁曰夏陽有太姒塚在夏陽城內按夏陽城在縣東四十里故莘城在縣南二十里又縣東有羈馬城卽左傳秦伐晉取我羈馬者也○水經注云郃陽城南有瀆水東流于河與剗首水相近按爾雅瀆水出尾下郭璞註云在河東汾陰縣馮翊郃陽亦如之



相去數里夾河中渚上又有漢水源皆潛通左傳  
文七年晉敗秦師于令狐至于剗首杜注令狐在  
河東剗首坑在郃陽也志云漢水卽洽水也當縣  
有東鯉瀆王村瀆勃池瀆夏陽瀆俱沒入河見有  
白泉溫泉灰泉以資灌溉在縣東南四十里夏陽  
村○水經注云河水東南流絕疆泉又逕劉仲城  
北又逕姚武壁南寰宇記云夏陽縣界有姚武壁  
十六國春秋苻堅司馬姚萇爲慕容泓所敗懼罪  
奔渭北西州豪傑率衆歸之萇乃僭號于此築城  
曰姚武壁今址不存○志云梁山在縣北四十里  
春秋公羊傳曰洽陽之山也爾雅以爲晉望矣辛  
氏三秦記云梁山有故宮城亦名織錦城入韓城  
界○黃河在縣東四十里卽水經云河水東過郃  
陽者也飛浮山在縣東南四十里以與黃河相爲  
浮沒故名○罌浮渡在黃河之側昔韓信設疑兵  
于此誑魏王豹以木罌渡者又里許爲茶峪渡通  
山西之滎河縣界

韓城縣

在州城東北  
二百二十里

詩云有倬其道韓侯受命周武王之後也應劭風  
俗通云韓先與周同姓春秋韓武子事晉獻公封



之韓原因以爲氏○志云韓原在縣東南二十里  
有故城春秋秦獲晉侯以歸處史記范雎說秦王  
曰秦韓之地形相錯如繡者也又西南五里爲少  
梁城以西五里有大梁故此曰少梁以別之梁城  
以梁山得名界于郃陽卽詩韓奕篇所云奕奕梁  
山也古今地名註韓與梁在春秋時爲二國○水  
經注曰河水又南逕梁山原東晉之望也春秋成  
五年山崩壅河三日不流晉侯以傳問伯宗處矣  
河水又南岨谷水注之水在縣南十里注于河河  
水經高門原南層阜相承秀出雲表俗謂之馬門  
原文曰三周山卽爾雅三成爲崑崙丘也山下水  
際有二石室南北皆因阿結牖連扁接闥所謂石  
室相拒矣東廂石上杵臼之跡猶存北坎有微涓  
石溜豐周瓢飲似是棲隱遊學之所昔子夏教西  
河疑卽此類而無以辨之其水又東南流注于河  
○河水又南逕龍門口魏土地記曰梁山北有龍  
門山大禹所鑿通孟津河口廣八十步巖際鑿跡  
尚存并有古祠祠前有碑二所二碑字文紊滅不  
可復識一碑是太和中立竹書晉昭公元年河水  
赤于龍門京房易妖占曰河水赤下民恨也河水



又南右合陶渠水水出西北梁山東南流逕漢陽  
太守殷濟精廬南俗謂之子夏廟河水又東南逕  
華池池方二百六十步在夏陽城西北四里許故  
司馬遷碑文云高門華池在茲夏陽又東南逕司  
馬子長墓北墓前有廟及碑晉永嘉四年漢陽太  
守殷濟瞻仰遺文因建石室立碑樹柏焉太史公  
自叙曰遷生于龍門是其墳墟所在矣○寰宇記  
云龍門山在縣北五十里太史公墓在縣南二十  
里之芝川鎮黃河在縣北有禹門渡通山西河津  
縣芝川及瀉水河皆入焉瀉水即岨谷水也龍門  
山之北有河口略似龍門而不能通相傳鯀治水  
時所鑿績用弗成今名錯開河○唐書白樂天本  
傳樂天先世太原人北齊五兵尚書建者有功賜  
田韓城子孫遂家焉後乃徙下邳○張昇字杲卿  
韓城人宋仁宗時拜樞密院使與韓琦協心建儲  
貳英宗立乃請老退居者十餘年司馬光嘗疏稱  
昇忠清正直不可干以私云

澄城縣 在州城北  
百二十里

左傳文十年秦伐晉取北徵漢為徵縣韋昭云徵  
澄同後人訛為澄也故徵城在縣西南二十一里



○水經注云雲門谷水源出澄城縣界有甘泉水出縣西匱谷中其水特美堪造酒泉流東至坊新里左傳僖十八年梁伯益其國而不能實也命曰新里秦人取之文四年晉侯伐秦圍祁新城卽此處矣按志甘泉在澄水左岸又云卽澄水也發源大慶里西庄澗其水澄潔俗呼官泉雲門谷在縣西北七十里谷口似門水氣雲蒸故名○雲門谷又西北十里爲風谷山有洞穴出風歲時祀之按其地有界頭山北與洛川縣界○注水經云澄城溫泉其源有三奇川鴻瀉西注于洛漢武帝時臨晉人嚴上願穿洛水於是發卒穿渠自徵而起合龍首渠今縣西三十里有乾坑卽龍首之尾也有洛河渡去縣西南三十里通蒲城○圖經云泉河在縣西二里有泉水流入于河故名又里許爲洗腸泉相傳晉佛圖澄洗腸于此旱禱極應又縣南二里有棚鎗泉以光武北征時棚鎗得泉于此○志云壺梯山在縣北五十里階級層峻有似懸梯每雲霧集必雨再十里爲將軍山秦封白起武安君于此後人建祠祀焉再十里爲武帝山上有漢武帝廟相傳帝幸梁山經歷于此○臨高原在縣



南五十里宋李顯忠知同州以計執金撒離喝後  
由漢村經臨高原即此又其地有龍泉映帶洛溝  
味甘如醴隋文帝居同州時取飲焉○集古錄云  
唐澄城令鄭君德政碑陳君京撰鄭雲遊行書貞  
元十四年正月立

白水縣

在州城西北  
百二十里

水經注云洛水東南沮水入焉故洛水亦名漆沮  
水其境東南谷多白土因曰白水史記秦文公分  
清水為白水縣是矣柳谷水亦名彭衙水南流至  
白水縣南東北注洛水○寰宇記云彭衙故城在

縣東北六十里左傳文二年秦晉戰於彭衙者也  
註疏馮翊郃陽縣西北有彭衙城後漢安帝以上  
郡避羌寇寄理于此又西北二十八里有粟邑縣  
僻在山中其人謹朴漢薛宣為左馮翊以頻陽令  
薛恭換粟邑即此地矣○注水經云沮水又東逕  
粟邑縣故城北王莽之粟城也後漢封騎都尉耿  
夔為侯國其水又東北流注于洛按粟邑唐貞觀  
中省入櫟陽故櫟陽縣下有粟邑鎮長安志以翊  
唐觀在粟邑鎮內又有粟邑渡即縣東石川河渡  
也今櫟陽省入臨潼而粟邑則當縣仍有之○孔



安國注尚書云洛水源自北歸縣戎夷中自馮翊  
懷德縣入渭考漢懷德唐同州衙縣也白水朝邑  
俱有之漆水既自華原入沮又自白水縣入洛洛  
漆沮至白水始混爲一又自朝邑入渭故漢書謂  
洛卽漆沮也華原今省入耀州漆沮下流爲石川  
屬富平○杜拾遺廟在縣治儀門內唐至德二載  
甫自賊中竄歸行在肅宗授左拾遺許至三川迎  
家甫挈妻子至白水依舅氏崔少府居焉後人立  
祠刺彭衙行于中五季兵燬鄉人訛爲杜十姨廟  
塑十婦人像金貞佑間縣令陳炳掘地得彭衙行  
石刺乃知之亟命去十姨像仍塑拾遺像以祀攷  
少陵集有白水明府舅宅喜雨得過字吾舅政如  
此古人誰復過碧山晴又濕白水雨偏多精禱旣  
不昧歡娛將謂何湯年旱頗甚今日醉絃歌自註  
舅氏崔十九翁時爲白水縣尉云子美彭衙行中  
亦有夜深彭衙道月照白水山之句○按志曰陽  
武曰黃龍曰秦曰大神皆白水縣山也陽武黃龍  
俱在東南以土色黃其形蜿蜒如龍故有黃龍之  
名陽武相傳爲倉聖發靈處大神者山峯高峻儼  
若神形秦山卽禹貢北條之一俗傳唐太宗爲秦



王時兵至此不得過下馬禱之山涌道通云

耀州

在府城北  
百八十里

領縣一

唐天佑時李茂貞據鳳翔僭行墨制建置耀州實西魏之宜州漢之殺窬縣也注水經云宜水南出土門山殺窬故城漢書宣帝神雀二年鳳凰集殺窬仍于是處得玉寶乃建步壽宮詔赦天下其城北原亦曰步壽原□按土門山在州東南四里積土兩崖中豁如門故名唐杜甫詩我經華原來不復見平陸北上惟土門連天接窮谷華原乃州郭下縣也○殺窬城在州東北一里漢景帝時置縣于此元魏廢帝三年改爲泥陽縣隋開皇中又改泥陽爲華原縣元始省入□考說文殺及也从及示聲窬音詡或說城郭市里有不當入而入者暫下以驚牛馬曰殺故从及示詩曰荷戈與殺是矣宋龍圖趙師民守耀州以爲殺窬者祭神求福之意本秦地尚武以釁兵得名非書見之謂也○志云石磬山在州東五里山出青石可以爲磬自唐朝採用而泗濱之石遂廢白居易詩紀之孫思邈宅在此山陽有石洞其頂五峯對峙亦謂之五臺山○鑑山在州東十里每遇年豐則光照人試



之多驗州名耀者本此署後有望輝臺宋皇祐中華原令楊庭所勦○牛耳山在州西北十八里以兩山東西分若牛耳也又六十里爲木門山山坂相去各三里許有上中下之稱今坂存而門堙○玉女山在縣西北玉女堡又北爲桃兒天活二堡皆險阻處其東爲繡女房溝有石洞相傳後周明帝置綵女于此明帝嘗刺宜州云○寰宇記云漆水自同官縣界來逕州北沮水自邠州入州至白渠澤泉南合漆水俱入富平之石川河又有清水在州西三十五里十道志云清水谷鬼谷先生所居也水自雲陽界來南流入三原境州西北有澗谷河濁谷河俱自孝義鄉來注之○州北有通城渠及煙霧渠越城渠水磨渠皆引沮水者其漆渠退灘渠則爲漆水所注○地理志曰沮水出畿縣西東入洛今水自直路縣東南逕焦石山東南流歷檀臺川俗謂之檀臺水屈而夾山西流又西南逕君川世謂之宜君水又得黃嶽水口水西北出雲陽縣石門山黃嶽谷東南流注宜君水又東南流逕葭縣故城西縣以溪名漢景帝二年置其水南合銅官水○長安志云葭縣廟在州東二里



惠政坊又里許卽步壽宮故基也漢武帝廟在州  
 南五里冬溫坊又有唐長安二年所置永安宮○  
 姚萇殿在州西北七十里鳳遊鄉上有御池泉○  
 唐令狐楚併其子緇墓俱在州西北五里父老傳  
 云寺溝村有令狐氏祠堂○柳公權宅在州西北  
 四十里柳家原宅傍有筆塚○鄭樵金石畧云治  
 平元年閏五月二日耀州所獻受命寶玉簡赴都  
 堂叅驗命宰臣書玉簡以天授傳國受命之寶爲  
 文蓋漢魏間物也○唐太宗製孫真人頌碑在靜  
 明觀內後燬道士以榻本補刻之○左羽林將軍  
 臧懷亮碑唐李邕書○臧氏糾宗碑工部尚書臧  
 懷恪碑俱顏真卿書○左武衛中郎將臧希忱碑  
 韓擇木八分書○號王元鳳碑殷仲容書○左僕  
 射王播碑節度使王起碑俱柳公權書○步壽原  
 南巖下有佛像閣元魏之龍華寺也隋仁壽中建  
 閣覆彌勒像高二十仞故名有宋丞相富弼詩刻  
 以鄭公父言倅耀州時嘗隨任讀書云○雷簡夫  
 園居詩二十二首石刻見存蓋州圃也簡夫父孝  
 先知耀州亦隨侍至後復自爲尉故作此詩景祐  
 中通判張榘刻之○宋華原人趙光輔范寬皆精

陝西通志卷之三

四



繪事見宣和畫譜

同官縣

在州城北七十五里

水經注云銅官水出役初縣東北西南經銅官川謂之銅官水苻秦于此置銅官護軍後周立縣除金傍作同字考銅官護軍即今濟陽寨是也寨有土城高數丈與縣相爲犄角○長安志云同官縣城周一里無城壁西北倚虎踞山金山也漢弩臺二一在其北一在西南各去城一里亭子泉柏榆泉流遶其下○文王山在縣西六十里上有文王廟雍大記云文王射豐于此其西爲武王山有武

王廟○寰宇記云女華夫人祠在縣北三十里女華山上其山高峰秀出每大風雷多從華岳至此里人立祠禱焉長安志注縣界有女回山以女華夫人回華岳必經此山也○志云縣有同川及同官川卽沮水也縣東有雄川烏泥川縣西有雷平川水皆入焉又有三泉山在縣東南白馬山在西北各去縣四十里再十里爲馬蘭山盤川水所出與漢井泉水同入烏泥川○按州自晉已來皆爲役初縣後改泥陽以此名矣馬蘭山漢張光所戍建興中盧水胡反攻北地太守張損死之光爲郡



都尉以百餘人戍馬蘭得全擢新平太守○縣南有金牛嶺相傳秦王世民擒劉黑闥時過此嶺遇一牧童被虎噬其所牧牛與虎苦鬪牧童因得免秦王嘉之遂命捕殺此虎名曰金牛嶺又有唐太宗田獵獲兔處今名兔兒窩○女田山在縣東北五十里西高山之東俗傳秦築長城孟姜之夫戍死負其骸經此而返故名又東為神水峽蓋通榆林路也石崖峻削道從石峽中行至險阻舊設金鎖關巡司三谷水之所經矣石上往往有鑿孔深廣尺許皆古時碾磑跡○單雄信墓在城北故縣村之開福寺有石羊毀其半碑亦不存故老傳云是雄信墓

乾州

在府城西北一百六十里 領縣二

亦李茂貞建本唐京兆之奉天縣也高宗乾陵在焉以位置長安乾隅故名光宅元年分醴泉好時等縣置此額以奉陵寢爰有奉天之號建中初術士桑道茂請增築其城後朱泚之變德宗因駕幸焉向為乾州理所 國朝省入舊州志云九巘諸山控扼西北涇渭二水縈帶東南關中之奧區也○寰宇記云梁山在城西北五里即周古公踰梁



山至于岐下者秦以此建梁山宮昔有盜繆公駿馬於岐下而食公飲之酒卽此處也與野人塢相接○好時縣距城七里其側有軒轅臺漢郊祀志云時者神明所依止也自古以雍州積高神明之隩故立時以郊上帝諸神祠皆聚焉後周省入莫西縣以莫谷水在城西北而名源出永壽縣麻亭嶺來西南流入武功亦名武水水側有妣已墓○水經注云渭水又南莫水注之水出好時縣梁山大嶺泉南逕梁山宮西故地理志曰好時有梁山宮秦始皇建水東有好時縣故城王莽之好邑也漢書雍王邴迎擊漢陳倉邴兵敗還走戰于好時卽此處矣後漢世祖建武二年封建威大將軍耿弇爲侯國○志云沙溝泉在州東十里又東北二十里有其谷水源自永壽縣溫秀嶺來流入醴泉界合于涇水又武亭水西北自麟遊縣來經縣東四十里入武功界○寰宇記云乾陵在州西北五里梁山鄉封內周八十里與則天后同一陵陪葬太子諸王章懷已下凡五義陽公主一又有于闐國所進無字碑○僖宗靖陵在州東北十五里岑陽鄉與乾陵相接隔豹谷○漢蘓武墓在州東四



十里今名守節里○陸賈墓在州東北二十里屬  
岑陽其泉兩鄉○長安志云漢楊喜將軍廟在縣  
南二十里唐桑道茂廟在州西南三百一十步○  
狄梁公墓在州下陽果正鄉墓前石碣舊有題詩  
曰牝鷄聲裏紫宸寒神器都歸竊弄間一語喚回  
鸚鵡夢九霄奪得鳳雛還○李元紘開元初爲好  
時令賦役平允不嚴而治大有政聲遷潤州司馬  
發離百里士民號泣遮路烏鵲之類飛擁行車有  
詔褒美之并刺諸石○金楊奐墓在州東南十里  
奐字煥然號紫陽先生與其父振同葬元好問撰  
誌銘奐與好問俱能文奐有還山集行于世

武功縣

在州城西  
六十里

史記秦孝公作四十一縣鞏羨陽武功各其一也  
武功山在故縣西南百里與太白山相連皆極高  
上恒積雪望之皚然諺云武功太白去天三百山  
下行軍不得鳴鼓角鳴則疾風暴雨立至上有洞  
卽道書第十一洞天也又有太白神祠漢永平八  
年所建山半橫雲如瀑布則澍雨人常以爲驗語  
云南山瀑布非朝則暮南山卽終南山也道書謂  
之太乙山亦名太白山山上有谷春祠春櫟陽人



成帝時病死而尸不寒後忽出櫟南門而入太白  
山民爲立祠於山嶺春秋來祠中宿焉山下有太  
白祠民所祀也魏畧云吉茂蘓則值亂隱於太白  
山中以經籍自娛杜彥達曰溫泉水出太乙山其  
水沸湧如湯可治百病世清則疾愈世亂則無驗  
○十六國春秋云劉曜光初四年五月終南山崩  
長安人劉終於崩所得白玉方一尺有文字曰皇  
亡皇亡敗趙昌井水竭構五梁罅酉小衰困囂喪  
嗚呼嗚呼赤牛奮鞞其盡乎羣臣咸賀以爲石勒  
滅之徵也曜大悅齋七日而後受之于太廟大赦  
境內以終爲奉瑞大夫又有垂竹山距終南山一  
百里漢書古文以爲禹貢之敷物山矣亦斜水所  
出也○水經注云渭水於縣斜水自南注之水出  
縣西南衙嶺山北歷斜谷逕五丈原東諸葛亮與  
步騭書曰僕前軍在五丈原是矣原在武功十里  
水出武功縣故亦謂之武功水也是以亮表云臣  
遣虎步監孟琰據武功水東司馬懿因水長攻琰  
營臣作竹橋越水射之橋成馳去其水北流注于  
渭地理志曰斜水出衙嶺北至郿注渭水又東逕  
馬冢北亮與步騭書曰馬冢在武功東十餘里有



高勢攻之不便是以留耳渭水又逕武功縣故城北王莽之新光也○寰宇記云漢武功縣置在渭水南古郿縣地也唐武德三年于今理置稷州以堯封后稷于此處古爲有郿之國郿與糜音同新論曰郿民有會日以相與夜中市如不爲則有災咎今有后稷祠在縣城之西故寶意寺址○故糜城在縣西南二十里漢縣也後漢省復移武功縣于此亦名武功城有麋亭在城內幽恠爲祟後漢王恽除郡令之官爲女子理寃收繫亭長因遂安○關中記云姜原祠在郿城東城外有三峙原高五十丈水經注云五泉渠西自岐州扶風縣流入經三峙原有六堰門西魏大統間築以節水又東會成國渠魏尚書左僕射衛臻征蜀所開也號成國渠按隋文帝泰陵葬此原上又西原上有隋煬帝陵唐武德初高祖葬之于此○康德涵武功志曰今武功太白二山屬郿縣五丈三峙二原屬岐扶風太乙屬蓋屋俱不之載惟古糜城在縣南八里又四里爲漆水川今之郿封里有漆村以漆水所經書云自土沮漆者也漆水自幽岐之間來北受浴水南受滯水以入于渭漢書云糜在漆縣是



俗以武水為漆水者譌武水蓋縣之武亭川也○  
 水經注云雍水俗名白水亦曰圍川水西北自扶  
 風界流入莫谷水南經美陽縣與中亭川相合漢  
 永元中更封耿秉為侯國中亭水與上武亭川高  
 望川合注南流入渭按武亭水北自好畤縣來在  
 縣東十一里三百有二百又十里為高望川有高  
 望亭唐武后行宮在此內又云中宗築以望乾陵  
 也莫谷水即武水自乾州境來入縣南合武亭水  
 ○志云美陽城一名周城縣西北之中水鄉周太  
 王所居邑也詩云古公亶父來朝走馬率西水滸  
 至于岐下又曰周原膺膺董荼如飴爰契我龜築  
 室于茲謂是邑矣今美陽故城在縣西原八里西  
 原即周原亦曰雍原也秦宣太后宮設焉中亭川  
 為後周建德三年別置武功縣者乃今理耳唐柳  
 子厚武功縣丞廳壁記宋有游靖重修縣廳碑○  
 寰宇記云慶善宮在縣南十八里唐神堯舊宅太  
 宗降誕之所貞觀六年駕親幸之讌羣臣賦詩曰  
 壽丘唯舊跡豐邑乃前基粵予承累聖懸弧亦在  
 茲弱齡逢運改提劍鬱匡時指麾八荒定懷柔萬  
 國夷梯山咸入款駕海亦來思單于陪武帳日逐

陝西各縣志 卷之三

四



衛文螭端辰朝四岳無爲任百司霜節明秋景輕  
冰結水湄玄黃遍原隰儲待積京坻共樂還譙燕  
歌此大風詩起居郎呂才被之管絃爲功成慶善  
樂名九功之舞後廢爲慈德寺又有乘本寺寶意  
寺皆高祖之別宅也東面絕岸南臨渭水○李頻  
祠在六門堰上唐咸通時堰廢已百五十年頗爲  
武功令奏修之方歲饑乃發官倉備民浚渠按故  
道廝水溉田穀以大稔懿宗嘉之擢侍御史○長  
安志云漢蘓武墓在縣西十里之蘓村按縣北二  
十里有節義臺卽漢子卿故園也後徙于杜陵故  
亦稱杜陵人○唐韋應物長安人漁陽兵亂流落  
失職屏居武功相傳渭濱是其故宅應物有經武  
功舊宅詩茲邑昔所遊嘉會常在日歷載俄二九  
始往今來復慼慼居人少茫茫野田綠風雨經舊  
墟毀垣迷往躅門臨川流駛樹有羈雌宿多累恒  
悲徃長年覺時速欲去中復留徘徊結心曲○文  
獻通考杜陽雜編三卷晁氏曰唐蘓鸚字德翔撰  
光啓中進士家武功杜陽川雜錄廣德以至咸通  
時事○蘓氏演義二十卷陳氏曰唐光啓進士武  
功蘓鸚德翔撰此數書者皆考究書傳訂正名物



辯證訛謬有益見聞尤梁溪以家藏本刻之當塗  
縣○唐朱慶餘題武功姚主簿舍停午無公事垂  
簾樹色間僧來茶竈動吏散印床閒傍竹行過巷  
當門立看山吟詩老不倦未省話官班○宋祥符  
間張及爲武功令慕姚武功之爲人于是刻姚合  
縣居諸詩四十餘首于石今錄其首篇云縣去京  
城遠爲官與隱齊馬隨山鹿放鷄雜野禽棲遶舍  
惟藤架侵階是藥畦更師嵇叔夜不擬作書題○  
西遷注云縣西北倚高山其城半在山上卽武功  
山也東下屬漆水唐蘓頌武功人縣西十里有蘓  
許公神道碑一隸書廼不入武功志然予考雍大  
記云蘓頌墓在縣北十里義門鄉與好畤縣蘓武  
墓地里相接又按德涵志亦載云蘓許公墓在縣  
西南博村但南北方向不同耳然其神道碑在新  
寨西此似張羽王所見者○志又云宋游師雄墓  
在縣西北八里碑爲耕者所沒其地華表存師雄  
字景叔直龍圖閣久于邊陲著有勞績學師橫渠  
先生○張載子厚有綠野亭在縣南郭卽爲橫渠  
建也時有張山甫者爲武功簿與橫渠善故縣中  
子弟多從先生遊因建此亭 國朝河東薛瑄過



武功題廳壁詩持節西來過武功扶桑日出曉光  
紅渭河水遠波聲小太白山高樹影重遺址已無  
慈德寺居人猶說故爨封東行無限前朝事盡在  
黃塵綠野中○武功志列女傳內載苻秦時竇滔  
妻蘓氏名蕙字若蘭陳留令武功蘓道質第三女  
也年十六歸于竇氏滔甚敬之苻堅寇襄陽以滔  
為安南將軍留鎮襄陽滔携寵姬趙陽臺往蘓氏  
怨之不肯與俱而滔竟與斷音問後蘓氏悔恨自  
傷因織錦為迴文縱廣八寸計六百餘言縱橫反  
覆皆文章因以寄滔襄陽滔覽之感其意于是迎  
蘓氏來襄陽而歸陽臺于關中恩好愈篤蕙著有  
文詞五千餘言隋亂不傳只傳其回文回文有武  
后記言蘓氏事甚詳

永壽縣 在州城北九十里

本漢漆縣地後魏大統元年分立廣壽縣以西二  
十里廣壽原為名故有南豳城莫營關控扼險要  
皆魏置也周大象中改為永壽又云唐武德初置  
縣永壽鎮因以為名○寰宇記云烈山在縣東三  
里上有烈山神祠○翠屏山在縣西南即武陵山  
也狀如畫屏故名○高泉山在縣北二十里莫谷



水發源于此本名安陽泉南流經莫谷故曰莫谷  
 水○明月山在縣西南八十里其山團欒夜望之  
 如明月然有婁敬祠在此山上永壽志稱漢建信  
 侯敬晚居明月山能種金其地曰種金坪後人往  
 往于此掘得金云又十里曰崦山特高峭○錦川  
 河發源麟遊縣來經縣西南好時鎮其川出石如  
 錦為世所寶按好時縣元至正間併入者漢書高  
 帝紀雍王章即迎擊漢陳倉雍兵敗還走好時即  
 此處也○呂公渠宋呂大防所開自為記蓋邑無  
 井泉難于遠汲呂公行近境得泉二欲導而入城  
 地勢高下有差公乃用考工置水法以準之旬日  
 便疏為渠至今民賴焉○縣北二十里有平泉從  
 平地中湧出故名○漢陸賈好時人高帝使說南  
 越尉陀陀稱臣授大中大夫有墓屬州界

邠州

在府城西北  
 二百五十里 領縣三

尚書大傅公劉居豳度其原隰蔡氏以為即今邠  
 州蓋從唐開元間例改古文詔古豳字直書為邠  
 也○金石錄邠州節度使院記唐李方直撰○文  
 獻通考邠志二卷唐殿中侍御史凌準一撰邠軍  
 即朔方軍也歐陽文忠脩唐史嘗求此書不獲今



得于忠憲范公之孫伯高紹興乙丑晁公鄩記○  
考漢書云公劉處豳其人先王遺風好稼穡務  
本業故豳詩言農桑衣食之本甚具然其俗尚勇  
力習戰備蓋居處戎狄勢使之然也曰南豳州自  
後魏大統年始以北郡別有豳故此爲南唐開元  
以豳與豳字相涉故改爲邠 國朝以新平宜祿  
二縣省入○按新平本漢漆縣屬右扶風後漢書  
世祖建武八年隗囂悉衆攻洛陽上至漆進止未  
定會馬援夜至聚米以爲山谷指軍所從入上笑  
曰虜在吾目中卽此地也苻秦改爲新平縣○宜  
祿本漢鶉觚縣屬安定周地圖記云秦使扶蘇蒙  
恬築城至此以觚爵奠祭乃有鶉鳥飛集觚上以  
爲靈異縣名取焉後魏廢帝元年以縣南臨宜祿  
川又改爲宜祿縣○按後漢興平元年分安定之  
鶉觚右扶風之漆置新平郡水經注云漆水自宜  
祿界來又東過扶風漆縣北以水經驗之邠州所  
理漆縣是也漢書注云漆水在縣西今縣西南九  
里有白土川水東北流經白土原東陽原西又東  
北流注涇水或恐白土水是漢漆水耳卽隋開元  
中移白土縣入州城者也十六國春秋苻堅至五



將山姚萇將吳忠圍之堅衆奔散神色自若召宰人進食俄而忠至執堅歸新平幽之逼求傳國璽堅瞋目叱之曰小羌乃敢逼天子耶璽已送晉不可得也萇乃縊堅于新平佛寺有苻堅墓在焉○水經注云汭水又東逕宜祿川俗謂之宜祿川水周禮職方氏雍州其川涇汭詩大雅公劉之篇曰止旅乃密芮鞠之卽者也經又云芹川出羅山千子嶺東流經宜祿縣北過西入淺水原按鶡觚原一名淺水原唐書武德元年薛舉寇涇州太宗遣總管龐玉自淺水原南出賊之右因高而陣上率大兵自原北出其不意斬首大獲卽此地矣按宜祿廢縣在州西九十里又北五里卽後魏廢淺水縣俗名折墻城唐初薛仁果居折墻城太宗圍之于此○志云新平今爲驛宜祿爲遞運所皆踵舊名故幽州城在治南又有幽谷在城東五十里舊三水縣治卽公劉立國處○唐杜甫石壕吏詩蔡夢弼註云石壕屬邠州宜祿縣卽漢鶡觚縣地昔北狄侵太王于此築城壕以禦之因名石壕下園曰石壕陝東城也其地在新安西自古有二說今並見之○形勝志云涇水遶其北邠巖峙其南州



城西南隅有紫微山連跨外郭又南一里有狼乳溝卽后稷棄而狼乳處又城東有洪龍河兩河西有水簾河大峪河皆注于涇○邠巖一名安定巖有安定閣在巖頂隋代碑云分奇挹秀如列畫障然○舊學基在州治南門外宋范仲淹爲守時築有文正公自爲碑公復建有眉壽堂記畧云昔公劉以農事開國邠風葵棗之化流浹至今畊田鑿井野無惰農歲有高廩爲此春酒以介眉壽斯民熙熙然躋和氣之域斯以名其堂也以眺境內之物壽山最著四面翠嶽及頂夷曠茂林脩竹中往往有數十家爲聚落似隱者之居○湘山野錄云江南徐鉉兒時戲於水濱有一狂醉道士怒目叱之曰我誠汝只在金魚廟何得竊走將撻之遇其父母營救切至乃縱之曰金魚廟將遷于邠彼時撻之未晚其後爲騎省果謫于邠而卒門人胡仲容歸葬之于豫章西山○杜甫有瘦馬行註云房瑄喪師陳濤因罷相出爲邠州刺史時論惜之故作詩曰東郊瘦馬使我傷骨骼硤兀如堵墻絆之欲動轉欹側此豈有意仍騰驤細看六印帶官字衆道三軍遺路傍皮乾剝落雜泥滓毛暗蕭條連



雪霜去年奔波逐餘寇驂騮不慣不得將士卒多  
騎內廐馬惆悵恐是病乘黃當時歷塊誤一蹶委  
棄非汝能周防見人慘澹若哀訴失主錯莫無晶  
光天寒遠放鴈爲伴日暮不收烏啄瘡誰家且養  
願終惠更試明年春草長○張舜民芸叟邠州人  
爲文豪重有理致而最刻意于詩宋慶曆間范仲  
淹帥邠見其文而異之用司馬光薦爲諫官仕至  
吏部侍郎後以黨籍謫監郴州酒稅羈置房陵政  
和中卒

淳化縣

在州東  
三百里

本雲陽縣宋淳化間析置因以爲名○按雲陽漢  
縣也秦立有雲陽宮始皇時程邈得罪幽繫雲陽  
在獄中作大篆奏之後世以史籍所作爲大篆邈  
爲小篆是也漢昭帝追尊母太后鈞弋夫人勅爲  
雲陵以其地立雲陵縣元始中廢惟雲陽縣歷唐  
宋元皆有之至我 國初始廢耳志云雲陵城在  
今縣北二十里又十里爲雲陽故城唐司空文明  
雲陽館與韓紳宿別詩故人江梅別幾度隔山川  
乍見翻疑夢相悲各問年孤燈寒照雨踈竹暗浮  
煙更有明朝役離杯惜共傳○開山圖云古雲陽



先生之墟中有神書鉄券玉石爲記秦以前于此作雲陽宮王褒雲陽宮記曰車箱坂下有梨園漢武帝所築大一頃樹木數百株青翠繁密望之如車蓋因以爲鎮名按長安志梨園鎮在縣西北金龜鄉後唐李克用討邠岐駐軍梨園寨是也○注水經曰五龍水出雲陽宮西南今謂之五龍谷泉流遶長箱坂下按長箱坂距縣西北二十八里縈紆曲折單軌纜通卽雲陽宮記所云車箱坂矣上坂平原宏敞樓觀相屬故趨甘泉道也甘泉宮置自山頂已距縣九十里○孟康注漢書曰甘泉一

名林光師古曰秦林光宮在磨石嶺嶺側有甘泉故漢武帝建甘泉宮卽取爲名其嶺高出它山距長安二百餘里而能望見長安城堞宮表有通天臺雲雨悉在臺下山中宮殿臺觀畧與建章相比百官皆有邸舍故帝以五月避暑八月始歸匈奴入寇烽火通甘泉者以人主不常在長安烽火兩通之也○漢書雲陽縣有休屠金人及徑路神祠三所越巫酤酈二所孟康曰酤音辜磔之辜越人祠也酤音穰屠音除音義曰匈奴祭天處本雲陽甘泉山下秦奪其地後徙休屠右地郊祀志徑路



神祀祭休屠王也○雍州記云金泉在縣西三十里泉湧數穴清澈無底人來汲飲見有金色從出照水往取得金故名又曰入冶谷二十里有百里槐樹樹北有泉名金泉谷按冶谷河西北自縣界流入三原之嵯峨鄉卽封禪書所謂谷口是也後漢鄭樸字子真隱於谷口高尚不屈躬耕巖石之下有泉水出焉時人因子真所居目曰鄭泉又謂之谷口石門唐石門縣設于此兩山壁立其狀如門史記秦獻公二十二年與晉戰于石門固此地矣在今縣北六十里○宋游師雄有題雲陽孟店西寺後壁畫記述其人物花竹雲雷諸品並絕神妙蓋華原趙評事光輔所作○蕪子瞻有戲作畫像詩云佳人自控玉花驄矯如飛燕踏秋鴻金鞭爭道金釵落何人先入明光宮按明光宮亦漢武所築在甘泉宮內嘗發燕趙美女三千人克之文忠蓋因婦人畫像用宮女事也又云武帝思李夫人不得見因圖其形于甘泉云

三水縣

在州城東北七十里

長安志云縣界有羅川谷三泉並流爲名設在古幽原上有幽亭背倚城隅面瞰湖水邑之偉觀也



陝西各州府志卷之三十一  
五  
攷後漢書三水人盧芳據城叛吳漢征之不克乃築三水城云○舊圖經鷄阜山在城北三里塔山在縣東四里俱以形肖而名又縣東北有石門山岡巒糾紛干霄秀出頂上石巖容數百人卽其泉賦所謂封巒石關施靡延屬者也又有馬嶺山俗名箭苦嶺翟道山一名千子山華池女郎山浴水出焉俱在邑界○按三水廢縣在淳化縣西百三十里元省入者本朝復析置此縣縣有三水河源出石門山流經縣東二里之玉泉在玉泉觀側又縣南三里之稍泉自高山湧出故名又縣北大像寺之白馬泉合爲一河故曰三水河○文獻通考三水小牘三卷陳氏曰唐皇甫牧遵美撰天祐中入三水者安定屬邑也○唐書侯君集三水人從太宗討竇建德有功圖形凌煙閣又平高昌刻石紀功而還○半川府在縣北十五里卽唐府兵之一云

長武縣

在州西北八十里

漢之鶉觚城唐之宜祿縣也我明省入邠州改爲長祿鎮萬曆十一年復置縣名長武○志云靜山在縣南十五里又五里爲宜山峻山前後二川河



所經○涇河在縣北二十里○黑水河在縣東四十里流遶黑虎山漢右內史汲黯切直強諫時渾邪王來降武帝令發車二萬乘以迎之縣官無錢從民貸馬馬不具上怒欲斬長安令黯曰長安令無罪獨斬臣黯民乃肯出馬且匈奴畔其主而降漢漢徐以縣次傳之何至今今天下騷動罷救中國而以事夷狄之人乎上默然始止今有汲公祠在縣治內

陝西各縣志卷之三 終



